

Geroari aurre egiteko malgutasuna aholkatu dio Ardanzak Deustuko Unibertsitateari

Lehendakariak atzo eguerdian, Donostian, abian jarri zuen 1998-99ko ikasturtea

Deustuko Unibertsitatearen ikasturte berriaren hasiera ekitaldia izan zen atzo. Bertan, Deustuko Unibertsitateko arduradun nagusien alboan, Jose Antonio Ardanza EAEko lehendakaria izan zen. Urteroko legea konplutuz —aurten azkenengoz, Lehendakariak utzi egingo baitu—, adeitasunez betetako hitzekin egin zuen inaugurazioa. Ardanzak Unibertsitateko arduradunei malgutasuna aholkatu zien, etorkizuneko erronkei aurre egiteko eta gizartearekin bat egiteko.



Ikasturtearen hasiera ekitaldia Donostiako campusean egin zen atzo, estreinako aldiz.

JACOBA MANTEROLA

Arantxa Iraola / Donostia

LEPORAINO bete zen atzo Deustuko Unibertsitateko Donostiako campuseko eliza. Izan ere, meza ostean hantxe bertan egin zen 1998-99ko ikasturtearen hasiera ekitaldia. Bertan, Deustuko Unibertsitateko arduradun nagusien alboan —han zeuden errektore Jose Maria Abrego, haren errektoreorde taldea eta Jesusen Lagundiaren kantzelariorde Igancio Etxarte—, Eusko Jaurlaritzaren izenean Hezkuntza sailburu Inaxio Oliveri eta lehendakari Jose Antonio Ardanza zeuden gonbidatu nagusien artean.

Hasiera ekitaldi horretan tarte berezia eskaini zioten unibertsitateko doktore berrien izendapenari eta unibertsitatearen alde hainbat ahalegin egin duten irakasle eta kolaboratzaileen ome-

naldiari. Jarraian, Donostiako Filosofia eta Letren Fakultateko irakasle Javier Gomez Piñeirik ikasturte berriaren irekiera-hitzaldia eskaini zuen.

Hastapeneko hitzaldi horren ostean, Jose Maria Abregok hartu zuen hitza. Deustuko Unibertsitateko errektoreak garrantzi berezia eman zion aurten hasiera ekitaldia Donostiako campusean egiteari, estreina aldiz egin baita bertan. Campus hori hartzen ari den indar handia nabarmendu zuen. «Deustuko Unibertsitateak Donostian duen campusa ez da oso ezaguna kanpoan. Deustuaz hitz egiten denean, ikusmira Bilbora mugatu ohi da. Etxe barruan, baina, ez zaigu horrelakorik gertatzen. Egunean-egunean gero eta gehiago ari gara jabetzen gure zerbitzu unibertsitarioaren hedadura geografikoaz», azaldu

zuen. Ildo horretan, Donostiako campusak eskaintzen dituen ikasketak aipatu zituen, eta propio aipatu zituen Euskal Filologia eta Ingeles Filologia, aurten horietan —ikasleen beherakada dela eta— ez baitute ikasle berririk onartuko. Geroan, Euskal Filologiari eutsi nahi diotela esan zuen, hala ere.

Errektoreak, halaber, plazartu zituen Eusko Legebiltzarrak onartutako Unibertsitatea Antolatzeke Legeak sortzen dizkien hainbat kezka. Horiek gainditzeko elkarlanaren aldeko apustua egingo dutela esan zuen.

Malgutasuna, etorkizunera moldatzeko giltza • 98-99ko ikasturtearen hasiera ekitaldiko hitzaldian Jose Antonio Ardanzak, berriz, Deustuko Unibertsitateari dion errespetu eta mirespena

adieraztearekin bat, etorkizuna izan zuen ahotan. Etorkizuneko erronka berriei aurre egiteko malgutasuna zein garrantzitsua den ekarri zuen gogora. «Argi dago une bakoitzak bere erantzunak behar dituela, eta argi dago Unibertsitatearen kudeaketa on batek aldatzeko erraztasuna, gaitasuna eta malgutasuna eskatzen dituela». Eremu horretan, gainera, sarritan Deustuko Unibertsitatearen jarrera eredugarria izan dela esan zuen.

Unibertsitate publikoak lortu duen sendotasuna, kanpotik etorri diren beste unibertsitate batzuen presentzia eta jaiotza tasaren beherakada Deustuko Unibertsitatearentzat etorkizun korapilatsuaren atarikitza jo zituen Ardanzak. Hala, hor gertatuko den lehiakortasunean zintzoki eta gogotsu borrokatzeko gonbita egin zien bertako arduradunei. «Kalitatea baita», esan zuen, «lehiakortasunaren borroka irabazteko armarik onena».

Gonbit berezia egin zuen, halaber, bake bidean parte har dezaten. «Kristau unibertsitatea zarenenez, baketzean konprometua har dezazuen eskatu dizuet», esan zuen. Bizi dugun egoera historikoan dei hori indartu nahi duela gogorarazi zien.

Hasiera ekitaldiaren ostean, Pedro Arrupe eraikina bedeinkatu eta inauguratu zuten. Donostiako campuseko eraikin berria da hori, bost solairu ditu eta ikasturte honetan jada hainbat ikasle eta irakasleren lantoki berria izango da. X

Lanbide heziketan batera jarduteko akordioa sinatu du Gobernu Nafarrak Iberdrolarekin

■ Nafarroako zentro publikoetako ikasleen hezkuntzan parte hartuko du Iberdrolak

Europa Press / Iruñea

NAFARROAKO GOBERNUKO Hezkuntza eta Kultura kontseilari Javier Markotegik eta Iberdrolako Nafarroako ordezkari Jose Javier Gironesek hitzarmen bat sinatu zuten atzo, hemendik aurrera lanbide heziketan elkarlanean jarduteko.

Akordio horretan hitzartutakoaren arabera, Iberdrolak hamar lanpostu eskainiko ditu, zentro publikoetako ikasleek bete ditzaten. Kontuan hartu behar da lanbide heziketa akademikoki arautu zutenean derrigortzat jo zutela ikasleek nolabaiteko lan esperientzia izatea.

Iberdrolak postu horiek zehaztean zeregin batzuk bereizi ditu, ikasleak interesgarrien gertatzen zaizkienetan murgil daitezten. Halaber, Iberdrolak esku hartuko du Nafarroako Gobernuak Hezkuntza eta Kultura Sailaren pean lanbide heziketan lanean ari diren irakasleen formazioan.

Ordainez, Iberdrolako langileek esku hartu ahal izango dute lanbide heziketa eskaintzen duten zentroetako ikastaroetan, eta, halaber, formaziorako egoki iruditzen zaizkion instalazio batzuk ere erabili ahal izango ditu. X



EGUTEGI ADMINISTRATIBOA 1998-99 IKASTURTERAKO

Lehen kurtsoa egiteko onartutako en zerrrendak

Nafarroako Unibertsitate Publikoak iragarri du gaurko, hau da, urriaren 1eko 9:00etatik aurrera ikasgelategian jarrita egongo direla lehen kurtsoa egiteko onartutako en hirugarren zerrrendak eta itxaron-zerrrendak. Zerrrenda horiek argitaratzeak edukia interesatuari jakinarazi zaiolako ondorio administratiboa sortzen du. Beren onarpen-eskabidearen egoeraz galdetu nahi dutenek 901 11 64 16 telefonora dei dezakete.

Onartutako en matrikula Karrera Esperimental eta Ez-esperimentaletako bulegoetan egin beharko da urriaren 13, 14 eta 15ean, unibertsitateko ikasgelategian urriaren 9an jarriko den egutegian adieraziko diren orduetan egin ere. Ez da beharrezkoa izango ordua aldez aurretik eskatzea.

Iraileko ikasleen aurretiko izen-ematea:

Nafarroako Unibertsitate Publikoak, plaza batzuk bete gabe gelditzeke posibilitatea aurreikusiz, aurretiko izen-ematea egiteko epea ireki du unibertsitate sartzeko aukera ematen duten ikasketak 1998ko irailako deialdian gainditu dituzten ikasleentzat; epea honako ikasketak eta sarrerak mota hauetarako da:

Bigarren Mailako Lanbide Heziketa edo Baliokidea:

Nekazaritzako Ingeniaritza Teknikoa; Maisua: espezialitatea Lehen Mailako Hezkuntzan; Maisua: espezialitatea Atzerriko Hizkuntzan; Maisua: espezialitatea Musika-Hezkuntzan.

Unibertsitate-Tituludunak edo baliokideak: Nekazaritzako Ingeniaritza Teknikoa, Lizentziatura Ekonomian, Lizentziatura Enpresa-Administrazioan eta -Zuzendaritzan, Telekomunikazio-Ingeniaritza, Nekazaritza-Ingeniaritza, Industria-Ingeniaritza, Diplomatura Enpresa-Ikasketan, Industria-Ingeniaritza Teknikoa.

Unibertsitateko Sarbide-Probak edo baliokideak: Lizentziatura Zuzenbidean, Nekazaritza-Ingeniaritza.

Aurretiko izen-ematea urriaren 5 eta 6an egingo da, 8:30etik 14:00etara, Administrazio eta Gestiorako eraikineko Sarbideko Bulegoan. Orriak eraikin horretan bertan jaso beharko dira.

Informazio gehiago 948 169 638 telefonon.

* Lan Harremanetako Diplomaturan edo Soziologiako Lizentziaturan matrikulatu nahi dutenek ez dute egin behar aurretiko izen-ematea. Bi titulazio horietarako matrikula urriaren 16an egingo da. Aldez aurretik, ordua eskatu beharko da urriaren 13 eta 14an, 948 169 884 telefonora deituz.

Egungo irakaskuntzaren «egitura inposatua» gainditzearren alde egin du IAK

■ Eredua euskaldun baten bidean, pausoak emateko borondatea azaldu dute

Idoia Guenaga / Bilbo

IKASLE ABERTZALEAK taldeak (IA) egungo egoera politikoan ireki daitezkeen perspektiba berriak itxaropenez ikusten ditu. Atzo Bilbon adierazi zuten, «bat egiten dugu azken aste hauetan indar abertzaleek gure herriak pairatzen duen egoera mingarri bezain bidegabeari irtenbidea emateko egin dituzten mugimenduekin». Eta egoera honetan ikasleek parte hartze zuzena izan behar dutela aldarrikatu zuten: «Euskal ikasleok gure herriko subiranotasunaren aldeko lane-

an lehenengo lerroan egongo gara».

Bestalde, irakaskuntza egoterra politikoki berriaren islarik ez du ikusten IAK, «badirudi irakaskuntza hortik aparte gelditzen den zerbait dela, ez dela ezer mugitzen», eta horren kezka plazaratu zuen Igor Arroio IAKo bozeramaileak. Madrildik eta Paristik atondutako «irakaskuntza egitea inposatu» baten menpe jarraitzen dute ikasleek, eta egitura horrek, Arroioaren hitzetan, «ondorio mingarriak dakartzela ikasleentzat, eta, beraz, baita Euskal Herria berarentzat ere».

Egungo egitura hori gainditu eta irakaskuntza eredu euskaldun baten bidean aurrerapausoak emateko borondatea azaldu zuen IAK. Baina bide horretan «funtsezkoa da irakaskuntzako zein gizarteko sektoreek bat egitea», adierazi zuen Arroio. «Desmobilizaturik eta erosokerian murgildurik daudenei», euskal irakaskuntzaren aldeko mugimendu batean biltzeko deia egin zien; hezkuntza politika bideratzeko agintea daukatenei, berriz, Madrilekiko loturak hausteko exijitu zien IAKo bozeramaileak. X